

पेत्राने लिहिलेले पहिले पत्र पेत्रनी लिखेल पहिलं पत्र वळख

१ पेत्र, हाई पुस्तक प्रेषित पेत्र यानी लिखेल व्हतं. पेत्रनी हाई सांगीसन आपला पत्रनी सुरवात करी की, तो कोण शे अनी कोणाकरता लिखी राहीना. त्यानी गैरयहूदी म्हणेल सर्व ख्रिस्ती लोकसले पत्र धाडीसन सुचना कर्यात. १:१; १:१७ अनी २:११ त्यानी आपला वाचकसले असा बराचदाव संदर्भ दिधा, कारण त्या येगेगेगळा दिशामा पसरेल व्हतात. कारण हाई पत्र थोडफार इफिसकरसले पौलनी लिखेल पत्रसनामायक शे. बराच लोकसना असा ईश्वास शे की, १ पेत्र हाई पुस्तक ख्रिस्तना जन्मनंतर जवळपास ६५ वरीस नंतर इफिसना लोकसले लिखामा वनं. पेत्रनी रोमले पत्र लिखं त्याले तो बाबेल म्हणे. ५:१३

पेत्र सांगस की, त्यानी तुमले प्रोत्साहन देणारं अनी हाईच देवनं खरं तारण शे हाई सिध्द कराकरता हाई पत्र लिखेल शे. ५:१२१ पेत्र २:११; ३:७; अनं इफिस ५:१८-६:९; कलससै ३:१८; ४:६; यासनामा बरीच समानता शे. या सर्व तीन भागसमा कौटुंबिक नातेसंबंध अनी अधिकाऱ्यासनी आज्ञा पाळानी सुचना देवानी अस तो सांगस. तो ईश्वासनारासले दुःखना काळमा त्यासले प्रोत्साहन दिधं की शेवटना काळ जवळ येल शे. ४:१

रूपरेषा

१. पेत्र स्वतःनी वळखं करी देस, अनी त्याना वाचणारासले संबोधित करस. १:१-२
२. मंग तो देवना तारणकरता आभार मानस अनी त्याना त्यासना जिवनकरता काय अर्थ शे, हाई सर्वासले सांगस. १:३-२:१०
३. पुढे तो ईश्वास ठेवस की, जगमा चांगलं कसं रहावानं अनी नवरा अनं बायको अनी दास अनं मालक यासना येगेगेगळा संबधले संबधीत करस. ४:१२-५:११
४. नंतर जवय पीडीत लोकेसले त्रास देवामा वना, तवय त्यासले धीर दिसन प्रोत्साहन करस. ४:१२-५:११
५. त्यानानंतर त्यानी आपला पत्रनी समाप्ती करी. ५:१२-१४

1 येशु ख्रिस्तना प्रेषित पेत्र याना कडतीन; देवबापनी निवडेल पंत, गलतीया, कप्पदुकिया, आशिया अनं बिथुनिया या गावसमा पांगेल यहूदी लोकेसमा राहणारा,

2 देवपिताना पुर्वज्ञानतीन, आत्मानाद्वारा व्हयेल पवित्रतामा टिकीन रूहावाकरता अनं त्यावर येशु ख्रिस्तना रक्तनं सिंचन व्हावाकरता निवाडेल प्रवाशी, यासले तुमले कृपा अनी शांती भरभरीन मिळो.

जिवननी आशा

3 आमना प्रभु येशु ख्रिस्तना देव अनी पिताना गौरव व्हवो, ज्यानी येशु ख्रिस्तले मरेलस मातीन जिवत करीसन अनी आपली मोठी दयातीन आमले जिवत आशाकरता नवा जन्म दिधा.

4 की, तो वारसा प्राप्त कराले पाहिजे जो अविनाशी, निष्कलंक अनी निर्मळ शे अनी तुमनाकरता स्वर्गमा ठेयल शे.

5 तुमनी रक्षा परमेश्वरना सामर्थ्याना द्वारा ईश्वरसतीन त्या तारणकरता कराई जास, जे शेवटना काळले प्रकट व्हनार शे.

6 तुम्हीन तारणबद्दल आते आनंद करतस जरी थोडा येळपावत, बराच परिक्षासमा पडीन तुम्हीन दुःख भोगात.

7 तुम्हीन यानाकरता भोगं की, तुमना ईश्वरस खरा शे हाई पारखाई जावं, जश नाशवंत सोनं पारखाई जास त्या सोनापेक्षा तुमना ईश्वरस मुल्यवान शे यामुये तो बी पारखाई जाईन तो शुध्द असा निघो ज्यामुये प्रशंसा, गौरव अनं मान ह्या फळं येशु ख्रिस्तना प्रकट व्हावाणा येळेले तुमले मिळतीन.

8 त्याले तुम्हीन दखं नही तरी तुम्हीन त्यानावर प्रेम करतस; आते तो दखास नही, तरी त्यानावर ईश्वरस ठेवतस; म्हणजे तुम्हीन गौरवतीन मोठा आनंद करतस जो शब्दसमा नही सांगता येस.

9 अनी त्यानामा तुमनं ईश्वरस कराना उद्देश म्हणजे तुमले तुमना जिवनं तारण मिळेल शे,

10 ज्या संदेशासनी तुमनावर होणारी कृपाबद्दल भविष्य करं, त्यासनी त्या तारणबद्दल बारकाईतीन शोध करा;

11 त्या भविष्यवक्तासनी ख्रिस्तवर येणारा दुःखनी येळ अनी तो गौरव जो या दुःखनंतर प्रकट व्हई याना शोध ख्रिस्तना आत्माघाई करा जो त्यासनामा व्हता.

12 त्यासले अस प्रकट करामा येल व्हतं की स्वर्गामातीन धाडेल पवित्र आत्माघाई तुमले सुवार्ता सांगणारासनी ज्या गोष्टी तुमले आते सांगेल शेतस त्याच

गोष्टी सांगानी सेवा त्या करी राहूँतात; ती सेवा स्वतःकरता नही, तर तुमनाकरता करी राहूँतात; या गोष्टी लक्ष लाईन दखानी तीव्र ईच्छा देवदूतसले शे.

पवित्र जिवन जगाकरता बलवणं

13 यामुये तुमनं मन कृतीकरता तयार करा, अनी सावध राहिन येशु ख्रिस्तनं प्रकटीकरण व्हवाना येळले तुमले मिळणारी कृपावर पुर्ण आशा ठेवा.

14 तुम्हीन आज्ञाधारक पोर्या व्हा अनी अज्ञान व्यवस्थामातील आपला पूर्वीना वासनाना मायक वागु नका;

15 तर ज्यानी तुमले पाचारण करं तो जशा पवित्र शे तस तुम्हीन पण सर्व प्रकारनी वागणुकमा पवित्र रहा.

16 कारण, “मी पवित्र शे यामुये तुम्हीन पवित्र व्हा” असा शास्त्रलेख शे.

17 जो तोंड नही दखता प्रत्येकना कामप्रमाणे त्याना न्याय करस, त्याले जर तुम्हीन पिता म्हणीन हाक मारतस, जवय तुम्हीन प्रार्थना करतस तर आपला प्रवासना काळमा घाबरीन वागा.

18 तुमना पुर्वजसंना परंपरातीन चालत येल आपला व्यर्थ वागणुकपाईन सोनं, रूपं असा नाश होणारा वस्तुसपाईन नही,

19 तर निष्कलंक अनं निर्दोष कोकरा, असा जो ख्रिस्त, त्याना मुल्यवान रक्तघाई तुम्हीन मुक्त व्हयेल शेतस ह्या ध्यानमा ठेवा,

20 जगनी स्थापना व्हवाना पहिले त्याले देवनी निवडेल व्हतं अनी तोच काळना शेवट तुमनाकरता प्रकट व्हयना.

21 तुम्हीन त्यानाघाई देववर ईश्वर ठेवणारा व्हयेल शेतस; त्या देवनीच त्याले मृतअवस्थामातीन ऊठाडीन त्यानं गौरव करं, यामुये तुमना ईश्वर अनं आशा देववर शे.

22 सत्यनं पालन करत खरं बंधुप्रेम दखाडाकरता तुम्हीन आपला आत्माले शुध्द करी लेयल शे, म्हणीन आते एकमेकसवर मनपाईन प्रेम करा.

23 कारण तुम्हीन नाश व्हणारा बीयापाईन नही, तर अविनाशी बीयापाईन म्हणजे देवना कायम जिवत राहणारं अनं टिकणारं वचनघाई परत जन्म लियेल शे.

24 *कारण, सर्व मानवजात गवतसारखी शे; अनी तिनं सर्व गौरव गवतना फुलमायक शे. गवत सुकस अनं त्यानं फुल गळस;

25 पण प्रभुनं वचन सर्वकाळ टिकस. जी सुवार्ता तुमले घोषित करेल व्हती ती सुवार्ता म्हणजे हाईच ते वचन.

* 1:24 1:24 या वचनबद्दल यशया 40:6 मा लिखेल शे

2

जिवत दगड अनी पवित्र राष्ट्र

1 यामुये सर्व दुष्टभावना, सर्व कपट, ढोंग, हेवा अनं सर्व वाईट भाषण सोडी घा,
2 नविन जन्मेल पोर्त्यासना मायक, कायम शुध्द आध्यात्मिक दुधबदल तहान
लागेल असा रहा म्हणजे तुम्हीन वाढशात अनं तुमनं तारण व्हई.

3 * “प्रभु कृपाळु शे याना तुम्हीन अनुभव लेयल शे” अस शास्त्रलेख म्हणस.

4 माणससनी नाकारेल तरी देवना दृष्टीतीन निवडेल अनं मुल्यवान असा जो
जिवत दगड त्यानाजोडे येवामुये,

5 तुम्हीन बी अध्यात्मिक मंदिर, जिवत दगड, देवले आवडणारा असा
आध्यात्मिक स्वरूपना यज्ञ येशुख्रिस्तघाई अर्पण कराकरता पवित्र याजकगण असा
रचाई जाई राहिनात.

6 † कारण असा शास्त्रलेख शे; “दखा, निवडेल, मुल्यवान अशी कोनशीला मी
सियोनमा बसाडस; तिनावर ईश्वास ठेवणारा कवय बी फजित व्हाऊ नही.”

7 यामुये तुमले ईश्वास ठेवणारासले मान भेटी; ज्या ईश्वासले अमान्य शेतस
त्यासले, “बांधणारासनी नापसंत करेल दगड तोच मुख्य कोणशीला व्हयना.”

8 “अनी ठेच लागणारा दगड अनं आडफाटा व्हावणा खडक असा व्हयना;
त्या लोके वचनले नही मानतस म्हणीन ठेच खातस,” त्यानाकरता त्यासले नेमेल
पण व्हतं.

9 ✠ तुम्हीन तर निवडेल वंश, राजकीय याजकगण, पवित्र राष्ट्र, देवना स्वतःना
लोक असा शेतस; यानाकरता की ज्यानी तुमले अंधारमातीन काढीन आपला अद्भुत
प्रकाशमा पाचारन करं त्याना गुण तुम्हीन प्रसिध्द कराले पाहिजे.

10 त्या तुम्हीन पहिले लोक नव्हतात, आते तर देवना लोक शेतस; तुमले दया
मिळेल नव्हती, आते तर दया मिळेल शे.

11 प्रिय भाऊ अनं बहिणीसवन, ज्या तुम्हीन परका अनं अनोळखी शेतस त्या
तुमले मी ईनंती करस की, जिवसंगे लढाई करनारा शारिरीक वासनांपाईन दुर रहा;

12 गैरयहूदी लोकसमा आपली वागणुक चांगली ठेवा, यानाकरता की,
ज्यानाबदल त्या तुमले वाईट कामं करनारा समजीन तुमना विरुध्द वाईट बोलतस

* 2:3 2:3 स्तोत्र. 34:8 † 2:6 2:6 यशया. 28:16 ✠ 2:9 २:९ तिताले पत्र २:१४

‡ 2:9 २:९ निर्गम. १९:५-६ § 2:10 2:10 लोक नव्हतात म्हणजे त्या लोकसले कोणतीच वळख
नव्हती

त्याबद्दल त्यासनी तुमना चांगला कामे दखीन बातमीना दिनले देवनं गौरव कराले पाहिजे.

देवना सेवक

13 मनुष्यनी स्थापन करेल प्रत्येक व्यवस्थाले प्रभुकरता अधीन रहावा; राजा श्रेष्ठ शे म्हणीन त्याना अधीन रहावा;

14 अनी अधिकारी वाईट करनासले शिक्षा देवाकरता अनं चांगलं करनासनी स्तुती कराकरता देवनी धाडेल शे, म्हणीसन त्यासना अधीन रहा.

15 देवनी ईच्छा अशी शे की, तुम्हीन चांगलं करशात त्याघाई निर्बुद्ध माणससना अज्ञानले कोंडी ठेवानं.

16 आपला स्वतंत्रपणा हाई दुष्टपणानं झाकीन नही ठेवता तुम्हीन स्वतंत्र, तरी देवना दास, अस रहा.

17 सर्वासले मान घा, ईश्वासु लोकसवर प्रेम करा, देवना भय धरा. राजाले मान घा.

ख्रिस्तनं दुःखनं उदाहरण

18 घरना नोकरसवन, तुम्हीन आपला मालकना अधीन रहा; ज्या चांगला अनं नम्र फक्त त्यासनाच नही, तर ज्या कठोर त्यासले बी पुरं घाबरीन रहा.

19 कोणी देवनं नाव लिसन अन्यायतीन येल दुःखं सहन करतस तर हाऊ प्रशंसा करासारखं शे.

20 चुकीनं करामुये मिळेल बुक्क्या शांततातीन सहन करात त्यामा काय मोठी किर्ती? चांगलं करी राहिनात तरी दुःख भोगणं अनं ते शांतीतिन सहन करनं हाई देवले योग्य अस वाटी.

21 यानाकरताच तुमले पाचारण करेल शे; तुम्हीन त्याना पायासनं अनुकरण कराले पाहिजे म्हणीन ख्रिस्तनी दुःख सहन करीसन तुमनाकरता किता घाली ठेल शे;

22 त्यानी पाप करं नही, अनी त्याना चेहरावर कपट दिसनं नही;

23 त्यानी निंदा व्हई राहिती तवय त्यानी उलट निंदा करी नही; दुःख सहन करी राहिता तवय त्यानी धमकी दिधी नही; तर सर्व न्याय करनारा परमेस्वरवर आपली आशा ठेवा.

24 तो स्वतः तुमना आमना पापं स्वतःना शरिरवर वाहिन कूसखांबवर लई गया, यानाकरता की आपण पाप बदल मृत व्हईन न्यायीपणकरता जिवत रहावानं; त्याले बशेल मारना फटकामुये तुम्हीन निरोगी व्हायेल शेतस.

25 तुम्हीन मेंढरसनामायक भटकी राहीतात; पण आते तुमना जिवना मेंढपाळ अनं राखणारा यानाकडे मागे फिरेल शेतस.

3

नवरा अनं बायको

1 ☆बायासवनं, तुम्हीन तसच आपआपला नवरासना अधीन रहा; यानाकरता की कोणी वचनले अमान्य राही,

2 कारण त्या दखतीन तुमनी वागणुक कशी शुध्द अनी भक्तीपूर्ण शे.

3 ☆तुमनी शोभा केससनं गुंफणं, सोनाना दागीना घालणं, किंवा कपडा घालणं यासनाघाई बाहेरतीन आपेल नही र्हावाले पाहिजे;

4 तर जो नम्र अनं शांत आत्मा देवना दृष्टीतीन बहुमूल्य शे त्यानी, म्हणजे अंतःकरणमाधली जी अविनाशी शोभा ती र्हावाले पाहिजे.

5 याप्रमाणे पुर्वीं, देववर आशा ठेवणाऱ्या भक्तीमान बायासनी बी आपापल्या नवरासना अधीन राहिसन स्वतःले सुंदर दखाडं

6 जशी सारा आपला नवरा अब्राहामले धनी म्हणीन त्याना आज्ञामा राहिनी; तस तुम्हीन चांगलं करशात अनं कोणती बी भयप्रद गोष्टले नही घाबरशात, तर तुम्हीन सारान्या पोरी बनशात

7 ☆तसच, माणससवनं तुम्हीन आपला बायकाससंगे, योग्य समजदारपणातीन वागा कारण त्या तुमनापेक्षा जास्त नाजूक शेतस. त्यासले मान दया म्हणजे त्यासले बी तुमनासंगे देवनं जिवनरूपी कृपादान मिळी अनं तुमना प्रार्थनासले आडफाटा येवाऊ नही.

चांगलं करतांना भेटणारा त्रास

8 सारांश, तुम्हीन सर्व एकचित्त, अनं समान भावना; एकमेकसवर प्रेम करनारा, दयाळू, नम्र मनना असा व्हा.

9 वाईटबद्दल वाईट, शापनाबद्दल शाप देवु नका; तर उलट आशिर्वाद घा; आशिर्वाद हाई वतन मिळावाकरता तुमले पाचारण करामा येल शे.

10 कारण शास्त्र म्हणस;

“जर तुमले जिवनमा आनंद कराना शे
अनं चांगली येळ दखानी ईच्छा शे,
तर तुम्हीन वाईट बोलानापाईन

☆ 3:1 ३:१ इफिस ५:२२; कलससै ३:१८
कलससै ३:१९

☆ 3:3 ३:३ १ तिमथ्य २:९

☆ 3:7 ३:७ इफिस ५:२५;

- अनं खोट बोलानापाईन आपली जिभ सांभाळा.
- 11 त्यानी वाईटना त्याग करीसन चांगलं ते करानं;
त्यानी पुर्ण मनतीन शांती प्राप्त कराना प्रयत्न कराना.
- 12 कारण परमेश्वरना डोया धार्मीकसवर राहतस,
अनं त्याना कान त्याना प्रार्थनाकडे राहतस;
तरी वाईट करनासकडे देव पाठ करी लेस.”
- 13 जर तुम्हीन चांगला गोष्टीस कराकरता तयार शेतस तर तुमनं वाईट करनारा कोण?
- 14 ✨अनी जर तुमले धार्मीकपणाबद्दल दुःख सहन करना पडनात, तरी तुम्हीन धन्य; त्यासना भयतीन भिऊ नका अनं घाबरू नका;
- 15 तर ख्रिस्त प्रभु यानं भय धरीसन मनमा आदर ठेवा; अनी तुमनामा जी आशा शे तिनी ईचारपुस करनारा प्रत्येक माणुसले उत्तर देवाले कायम तयार रहा; तरी ते नम्रतातीन अनं नही घाबरता घा.
- 16 ते सदभावतीन घा; यानाकरता की ज्याबद्दल निंदा व्हस, त्याबद्दल ख्रिस्तमाधली तुमनी चांगली वर्तणुकवर आळ लेणारासनी लज्जित व्हावे पाहिजे.
- 17 चांगलं करीसन बी दुःख सहन करानं हाई जर देवनी ईच्छा व्हई तर, वाईट करीसन दुःख सहन करापेक्षा ते बर शे.
- 18 कारण आपलाले परमेश्वरजोडे लई जावाकरता ख्रिस्तनी बी पापसकरता, म्हणजे नितीमान माणुसनी अनितीमान लोकसकरता एकदाव मरना; तो शरिरना रूपतीन माराई गया अनी अध्यात्मिकपणतीन जिवत कराई गया;
- 19 त्या आत्माना रूपतीन त्यानी जाईन बंदिशाळामाधला आत्माजोडे घोषणा करी.
- 20 ह्याच त्या आत्मा व्हातात ज्यासनी नोहाना दिनसमा देवना अपमान करा, ते तारू तयार व्हई राहींत तवय देवनी सहनशीलता वाट दखी राहिती; तारूमा थोडाच म्हणजे आठ प्राणी पाणीमाईन वाचाडामा वनतात.
- 21 ते चिन्ह बाप्तिस्माना मायक शे, त्यानाघाई शरिरना मळ दुर कराना नही, तर चांगलं मन ठेवाकरता देवसंगे करार करनं हाई व्हतं; ते तो आते येशु ख्रिस्तना पुनस्तथानघाई तुमले वाचाडी राहिना.
- 22 येशु स्वर्गमा जाईसन देवना उजवीकडे बसेल शे; अनी स्वर्गदूत अनी स्वर्गीय अधिकारी अनी सत्ताधीश* ✨ या त्याना अधीन शेतस.

✨ 3:14 ३:१४ मत्तय ५:१०

*

3:22 3:22 सत्ताधीश आकाशमातील दुष्ट आत्मा

✨ 3:22

३:२२ सत्ताधीश इफिस ६:१२; दानीएल १०:१२,१३

4

बदलेल जिवन

1 ख्रिस्तनी शरिरना रूपमा दुःख सहन करात तसच तुम्हीन बी त्याच मनोवृत्तीतीन भक्कम व्हा; कारण ज्यानी शरिरना रूपमा सहन करेल शे तो पापपाईन निवृत्त व्हायेल शे.

2 यानाकरता की तुम्हीन उरेल शारिरीक जिवन मनुष्यना वासनांप्रमाणे नही तर देवना ईच्छाप्रमाणे जगानं.

3 कारण गैरयहूदीसनी ईच्छातीन काम करनं अनी असभ्यता, वासनासनी अभिलाषा, रंगेलपणा, दारूड्या अनं अमंगळ मुर्तिपुजा यामा रूहावामा जो काळ गया तितला पुरा शे;

4 तुम्हीन त्यासना ह्या जंगलीपणमा सहभागी व्हतस नही यानं त्यासले नवल वाटस अनी त्या तुमनी निंदा करतस.

5 जो जिवतसना अनी मरेलसना न्यायनिवाडा कराले तयार शे त्या देवले त्या हिशोब देतीन.

6 सुवार्ता मरेलसले बी सांगेल व्हाती, यानंकरता की, मनुष्यनमायक त्यासना शरिरसंबंधतीन न्यायनीवाडा व्हावेले पाहिजे, पण त्यासनी आत्माप्रमाणे देवसंगे जगाले पाहिजे.

देवना दानसना चांगला कारभारी

7 आते सर्वासना शेवट येल शे; यामुये मर्यादामा रहा, अनं प्रार्थना कराकरता तयार रहा;

8 एकमेकसवर एकनिष्ठातीन प्रेम करा; कारण प्रिती पापसले झाकी टाकस.

9 कुरकुर नही करता एकमेकसना पाहुणचार करा;

10 प्रत्येकले जसं कृपादान मिळेल शे तसं देवना येगयेगळ्या दानसना चांगला कारभारीनामायक ते एकमेकसनं चांगलं कराकरता वापरा.

11 भाषण देणारासनी आपण देवनं वचन सांगी राहिनूत अस बोलानं; सेवा करनारासनी, ती आपण देवनी पुरायेल शक्तीतीन करी राहिनूत, अशी करानी; यानाकरता सर्व गोष्टीसमा येशु ख्रिस्तद्वारा देवनं गौरव व्हावेले पाहिजे; गौरव अनं पराक्रम हाई युगानुयुग त्यानीच शेतस. आमेन.

ख्रिस्तकरता दुःख सहन कराना हक्क

12 प्रिय भाऊ अनं बहिणीसवन, तुमना अग्नीपरिक्षाकरता संकट तुमनावर येल शे त्यानावरतीन आपलासंगे काही येगळं घडनं तर त्यानं नवल वाटू देऊ नका;

13 जसं जसं तुम्हीन ख्रिस्तना दुःखना वाटेकरी व्हेयेल शेतस तवय आनंद करा; म्हणजे त्यानं गौरव प्रकट व्हवाना येळले तुम्हीन उल्लासतीन आनंद करशात.

14 ख्रिस्तना नावमुये तुमनी निंदा व्हवामुये तुम्हीन धन्य शेतस; कारण गौरवना आत्मा म्हणजे देवना आत्मा तुमनावर ई राहिना शे.

15 तरी खुण करनारा, चोर, दुष्कमीं किंवा दुसरासना कामसमा ढवळाढवळ करनारा अस व्हईन दुःख भोगाले नको.

16 ख्रिस्ती म्हणीन कोणी दुःख सहन करस तर त्यानी लाजानं नही; त्या नावमुये देवनं गौरव करानं.

17 देवना घरपाईन न्यायनिवाडानी सुरवात करानी येळ शे; अनी ती सुरवात पहिले आपलापाईन व्हयनी, तर देवना सुवार्तांना अपमान करनारासना परिणाम काय व्हई?

18 पवित्रशास्त्र हाई सांगस, “नितीमान माणुस जर कष्टतीन वाचस तर अनितीमान अनं पापी माणुसनं काय व्हई?”

19 यामुयेच देवना ईच्छाप्रमाणे दुःख सहन करनारासनी चांगली कृती करत, आपण स्वतःले ईश्र्वासु उत्पन्नकर्ताले सोपी देवाना.

5

वडील लोके अनी तरुणसले संदेश

1 तुमनामाधला वडील लोके शेतस, मी त्यासनामायक वडील अनी ख्रिस्तना दुःखसना साक्षीदार अनी प्रकट व्हनारं गौरवमा सहभागी व्हईसन त्यासले हाई समजाडी राहीनु;

2 ☆तुमनामाधला देवना कळपनं पालन करा; करनं पडस म्हणीन नही, तर देवना ईच्छाप्रमाणे आनंदतीन त्यानी देखरेख कर; द्रव्यलोभतीन नही तर उत्सुकतातीन करा;

3 ज्या लोके तुमले सोपेल शेतस, त्यासनावर अधिकार चालाडू नका, पण तुमना गटकरता आदर्श बना.

4 मंग मुख्य मेंढपाय प्रकट व्हई तवय तुमले गौरवना मुकूट भेटी ज्यानी चमक कधीच जास नही.

5 तसच तरुणसवनं, वडीलसना अधीन रहा, अनी एकमेकसनी सेवा कराकरता तुम्हीन सर्वजण नम्रपणाना कमरबंद बांधा; कारण “देव गर्विष्ठसना विरोध करस, अनी नम्र लोकसवर कृपा करस.”

6 ✨यामुये देवना पराक्रमी हातसखाल नम्र व्हा यानाकरता की त्यानी योग्य येळले तुमले उंच कराले पाहिजे.

7 त्यानावर तुम्हीन आपली सर्व चिंता टाका कारण तो तुमनी काळजी लेस.

8 सावध रहा, जागे रहा; तुमना शत्रु सैतान हाऊ गर्जना करनारा सिंहनामायक कोणले खावानं हाई शोधस फिरस;

9 त्याना विरुध्द ईश्वासमा भक्कम रहा अनी त्याना सामना करा; जगमाधला बाकीना ईश्वासणारासले ह्याच दुःख ठरायेलप्रमाणे व्हई राहिनात हाई ध्यानमा राहु घा.

10 तुम्हीन थोडा येळ दुःख सहन करानंतर, आपला सार्वकालिक गौरवमा येवाले पाहिजे म्हणीसन ज्यानी ख्रिस्तमा तुमले पाचारण करं तो सर्व कृपाना देव स्वतः तुमले पुर्ण, भक्कम अनं प्रबळ करी.

11 त्यानं साम्राज्य युगानुयुग राहो. आमेन.

शेवटना नमस्कार

12 ✨मना मतघाई ईश्वासु असा आपला भाऊ सिल्वान याना हातमा मी थोडकामा हाई लिखीन धाडीन यानामा बोध करेल शे अनं साक्ष देयल शे की हाई देवनी खरी कृपा शे, यानामा भक्कम रहा.

13 ✨बाबेल देशमा तुमनामायक निवाडेल मंडळी तुमले सलाम सांगस; अनी ख्रिस्तमा मना पुत्र मार्क हाऊ बी सांगस.

14 प्रेमतीन एकमेकसले सलाम करा. ख्रिस्तमाधला तुमले सर्वासले शांती राहो.

प्रेम संदेश

**The Gospels of Matthew and Mark in the Ahirani
language of India. Ahirani: प्रेम संदेश (Bible)**

copyright © 2023 The Word for the World International and Ahirani Christi
Iswari Mandli, Sakri, Dhule, Maharashtra

Language: अहिराणी (Ahirani)

Contributor: The Word for the World International

प्रेम संदेश

जुना करार, 2025

The Old Testament Books in Ahirani Language

The Word for the World International

This translation is made available to you under the terms of the Creative
Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did so in
a way that makes it clear that the original licensor is not necessarily
endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

Note that in addition to the rules above, revising and adapting God's Word
involves a great responsibility to be true to God's Word. See Revelation
22:18-19.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

6e2997e4-b06d-5108-bd98-2b3ff67a6f92